

des lebines, daz dar umme stunt, und sprach zu sime sune: »min sun, wilt du daz ich lebe, so louf balde vor daz paradis und bit den engel der da vore stet mit eime furigen swerte, daz her mir sende eine frucht vom dem holze des lebines, daz ich iz ezze und daz ich lebe und kume wider in mine ersten jugent.« Und her tet diz, und der engel gap ime ein ris von deme boume, do Adam und Eva haten daz gebot sine gebrochen. Und do der sun quame mit diseme rise, do was Adam tot. Do stizin si ime diz ris zu grozen eren zu sinen houbiten, und iz bekleip und wuchs ein groz boum dar uz. Do der künig Salomon liez den tempel buwen zu Jerusalem, do buwete her in von helfenbeinen und von mermelinen steinen und von cypressem holze und von golde; do his man diz cypressin holz zu deme tempele. Do der tempel gereit wart, do kunde sich das holz nirgen dar ane gefugen. Do liz iz der künig Salomon legen in den tempel inpor, daz man iz ane sach durch die erberikeit des holzes. Und do die wissagerinne Sibylla quam zu Salomon und solde den tempel besehen, do sach si daz holz dō ligen. Do sprach si: »do lit daz holz da der juden herschaft sal ane ein ende nemen.« Do deme künige die rede vure quam, do wart her betrubit, wan waz dise Sibylle sagete, daz wart wor. — Kunic Salomon nam diz holz und liez iz begraben in eine wazzerige stat finfhundert klaftern in die erden, und diz holz wuchs her uf bi vile jaren, daz iz wart zu eime stege uber daz wazzer. Und der künig von Oriente der zogite zu Jerusalem und sach diz holz unde nam sine kuncelichen krone abe und neig diseme holze; und di daz sahen, die wistin nicht waz her meinete, und der künig wiste sin ouch nicht, wan iz wirkete got durch in. Aber dar nach wart ein groz tich an der selben stat, und daz holz lac in deme tiche und der tich wart in aberhemischen geheizen Bethsaida. Und do unser herre geborn wart, dar nach ginc der engel alle tage abe von dem himile und bewegete daz wazzer; und wer danne in daz wazzer quam, der wart gesund von aller siner suchen. Die alden bucher sprechen, daz daz wazzer hete die kraft von deme holze daz dinne lac, daz daz heilige kruze werden solde; aber di nuwen meistere sprechin, iz hete kraft von dem engel der daz wazzer bewegete. Aber andere glosen sprechen, iz were ein vorzeichen der toufe: wan in der toufe alle sunde vergeben werden, also wart ouch hi der mensche gesunt von aller siner suche. Sente Johannes schribet, daz in disen tich gingen fünf porthuser, und bezeichen di heiligen fünf wunden, die unser herre hat in sinem lichame. Di glosen sagen, daz man in disem tiche wusch di opher der lemmer und der kelber, die man solde ophern in dem tempel, und meinet: allez daz der mensche gote opheren wil, daz sal her zum ersten tragen in daz liden unses herren und sal iz dar inne waschen und reinigen, so wirt iz gote geneme.

Do di zit quam, daz unser herre sine marter liden wolde, do wart daz holz her uz genomen, und do unser herre vorurteilt wart von Pylato, do leite man ime diz holz uffe sinen hals; daz truc her an die stat, dō man in marieren solde. Do hinc man unsen herren an diz kruze. Do unser herre gestorben was und irstanden was und zu himile gevaren was, do gedachten die juden der prophezien, di di vrowe Sibylle hate gesaget deme künige Salomone und namen dit heilige kruze und begrubin iz in der erden wol hundert klaftern, und die zwei kruze, do die schechere klaftern. Und uber zwei hundert jar nach dem tode unses herren, do Constantinus bekart wart (den bekarte sancte Silvester), do hate sancte Helene, Constantinus muter, Jerusalem inne und hilt eine groze disputacion mit der kristenheit. Und wiltu dise legende lesen, so suche uffe sancte Silvesters tac in der prediate. Do di juden vorwunden wurden von den kristen, do vinc si alle die juden, und wolde wizen wo das heilige kruze begraben lege. Do wart ir vermeldit einer der hiz Judas; des elder vater hate geseit sime vater die stat. Und Judas ginc mit sente Helene und mit vile herren und mit heiligen luten an die stat, die ime sin vater gezeichnet. Und her ein bette und di anderen alle und baten got, ob daz kruze do were, daz unser herre ein zeichen do tete. Und do wart ein groz erzbibunge, und do slugen si in und vunden di dru kruze und leiten daz heilige kruze uf eine siche vrowen; di wart gesunt. Und do nach leiten si iz uffe einen toten; der stund uf und was gesunt. Do lizen sich der juden vile toufen und ouch sente Helene. Do sniten si daz kruze in dru stuck; ein stuck bleip zu Jerusalem; daz andere quam zu Constantinopels; daz dritte teil furte Constantinus zu Rome, do iz noch ist. Diz ist die historje wol zu halbeme wege von dem heiligen kruze also si genomen ist uz den alden buchern und von gewissen lernern der kristenheit.